

15 OCT 1999

Iran-Rancangan

IRAN PELAWA MALAYSIA MAINKAN PERANAN AKTIF DALAM RANCANGAN EKONOMINYA

KUALA LUMPUR, 15 Okt (Bernama) -- Iran hari ini mempelawa Malaysia untuk memainkan peranan aktif dalam rancangan ekonomi lima tahun ketiga negara itu yang akan disahkan oleh Parlimennya tidak lama lagi.

Naib Speaker Pertama Dewan Perundangan Iran, Dr Hassan Rouhani, berkata Malaysia boleh memainkan peranan aktif terutamanya dalam sektor pelaburan.

Pelawaan itu disampaikan kepada Perdana Menteri Datuk Seri Dr Mahathir Mohamad pada satu pertemuan mereka di Putrajaya hari ini, kata Dr Hassan padan sidang berita di sini.

"Secara umumnya, kami meminta perdana menteri memainkan peranan aktif bagi Malaysia dalam program-program ekonomi kami. Kami dapat meluaskan hubungan dua hala kami melalui langkah ini," katanya menerusi seorang penterjemah pada akhir lawatan seminggu beliau ke Malaysia.

Dr Hassan berkata kedua-dua pihak juga bersetuju untuk meningkatkan kerjasama mereka dalam industri gas dan minyak, bukan sahaja di Iran tetapi juga di negara-negara lain di rantau ini.

Petronas terlibat dengan medan minyak South Pars di Iran dalam satu usahasama dengan Total SA dari Perancis dan Gazprom dari Russia.

Dr Hassan berkata Iran dan Malaysia juga akan meningkatkan kerjasama mereka dalam bidang pendidikan, kebudayaan dan senibina serta meluaskan perbincangan mereka mengenai dunia Islam.

Beliau berkata pada pertemuan itu, mereka juga membincangkan isu-isu negara Balkan dan Timor Timur.

"Saya khususnya kagum dengan bangunan pentadbiran kerajaan di Putrajaya. Ia mempunyai banyak senbina Islam terutamanya yang diinspirasikan oleh Isfahan (bandar kembar Kuala Lumpur)," katanya.

Semasa lawatannya ke sini, atas jemputan Speaker Dewan Rakyat Tun Mohamed Zahir Ismail, Dr Hassan turut mengunjungi Timbalan Perdana Menteri Datuk Seri Abdullah Ahmad Badawi, Menteri Luar Datuk Seri Syed Hamid Albar dan melawat Unit Perancangan Ekonomi serta Koridor Raya Multimedia (MSC).

Dr Hassan berkata beliau percaya projek MSC itu akan membawa perubahan ketara kepada Malaysia dan Iran bersedia membekalkan Malaysia dengan pakar-pakar teknologi multimediana.

Beliau juga kagum dengan kejayaan Malaysia dalam mengatasi krisis ekonomi tanpa bantuan Tabung Kewangan Antarabangsa (IMF).

-- BERNAMA

AR NAK